

Aznar: «Eraikuntza nazionala, inoiz baino gehiago, utopia odoltsu eta onartezina da»


Euskal politikan norabide aldaketa behar dela esan zuen Espainiako presidentek

Agentziak / Madril

Jose Maria Aznar Espainiako presidentek gogor hitz egin zuen atzo EAJ-ren jarrerari buruz. Alderdi horri atentatuen baitan mugitzea leporatu zion, eta hori «onartezina eta higuigarria» dela esan zuen. EAJk Lizarrarekin eta HBekin apurtzea beharrezkotzat jo zuen. Euskal politikan norabide aldaketa bat behar dela azaldu zuen. Eraikuntza nazionala «utopia odoltsu eta onartezina» dela esan ondoren, Estatutuaren inguruko adostasuna lortu behar dela nabarmendu zuen.

EGOERA politikoaz mintzatzeko bildu zituen kazetariak Moncloako Jauregian Aznarrek, eta Euskal Herria izan zuen hizpide nagusi. EAJri buruz gogor aritu zen Espainiako gobernuburua. EAJk Lizarrarekin eta HBekin apur dezan zer gehiago gertatu behar duen galdetu zuen Aznarrek. Alderdi jeltzaleak mugitzeko «keinuak» atentatuen baitan egiten dituela esan zuen. «Higuigarria da onartzea EAJ mugitzen dela talde terroristak hiltzen duen neurrian».

Hildako gehiagok aldaketa ekarriko dutelako itxaropenik ez duela esan zuen Azna-



M. H DE LEON / EFE

Jose Maria Aznar Espainiako presidentea, atzoko agerraldian.

rek. Hala «aldaketak eskasak» izaten ari direla azaldu zuen, Durangokoa gogoan hartuta.

EAJk Lizarrarekin eta HBekin erabat apurtzea beharrezkoa dela esan zuen Aznarrek. Halaber, euskal politikagintzan «norabide aldaketa» bat beharrezkotzat jo zuen. EAJn, egungo buru-

zagiekin aldaketa ez duela sinesgarritzat jotzen adierazi zuen. Bestalde, norabide aldaketa hori emateko, zenbait puntu beharrezkoak dira haren ustez: «Estatutuaren inguruko adostasunera itzultzea eta herritarren eskubideen defentsan konpromiso argia eta logika demokratikoa berreskuratzea». Proiektu

JOSE MARIA AZNAR

■ ■ ■ «Onartezina da EAJk ildoazuzentzeko keinuak atentatuen baitan egitea, eta higuigarria orduan mugitzea»

soberanista kritikatu zuen, eta honela esan: «Eraikuntza nazionalaren proiektu sektarioa, inoiz baino gehiago, utopia odoltsu eta onartezina da».

Jauregiren kritika

Bestalde, Ramon Jauregi diputatu sozialistak EAJri bere jarrera «zuzentzen» lagundu behar zaiola erantzun zion Aznarri. «EAJren zuzenketa lagundu behar dugu, eta ez oztopatu», adierazi zuen. Haren arabera, baina, EAJren zuzenketa berandu dator, «ETak su-etena puskatzerakoan» hartu behar zuelako bide hori. «Baina EAJk keinuak egiten baditu, horretan laguntzearen aldekoa naiz eta ez oztopatzen hastekoa».

Xabier Arzalluzentzat Aznarren hitzak «gera adierazpenak dira argi eta garbi».

Elkarrizketaren alde azaldu dira Nafarroako eta EAEko IU

Edurne Begiristain / Gasteiz
NAFARROAKO eta EAEko IUko federazioek alderdien arteko elkarrizketaren beharra azpimarratu zuten atzo, Gasteizen eskaini prentsaurrekoan. Javier Madrazo eta Felix Taberna IUko EAEko eta Nafarroako koordinatzaileek azaldu zuten, egungo egoera zaila da, eta «blokeo» egoera batean gaude. Horri irtenbidea emateko beharrezkotzat jo zuten alderdi guztiak hizketan hastea.

Madrazok azaldu zenez, blokeo egoerak bi arrazoi ditu: batetik, ETAren eraso eta kale borroka; eta bestetik, indar politikoen artean «inkomunikazioa eta aurkakotasuna». ETaren «indarkeriaren» inguruan, Madrazok azaldu zuen ikuspuntu etiko eta politikotik atentatuek ez dutela «justifikaziorik». Horren ildotik, helburu politikoak erdiesteko «bide baketsu eta demokratikoak» erabiltzearen alde agertu zen.

Bestalde, alderdien arteko «inkomunikazioarekin» bukatzeko bake prozesu baten alde indar handiagoz lan egin nahi dutela adierazi zuen IUko koordinatzaileak. Haren ustez, Eusko Legebiltzarrean eta Nafarroako Parlamentuan alderdien arteko mahaia osatzea beharrezkoa da.

